

四庫全書

子部

欽定四庫全書

冊府元龜卷四百四十二

宋王欽若等撰

將帥部

敗衄第二

晉陸機成都王穎表為平原內史惠帝太安中穎假機
後將軍河北大都督討長沙王又列軍自朝歌至於河
橋鼓聲聞數百里漢魏以來出師之盛未嘗有也又與
機戰于鹿苑機軍大敗赴七里澗而死者如積焉水為

之不流將軍賈稜皆死之

新蔡王騰為車騎將軍鎮鄴時公師藩與平陽人汲桑等為羣盜起於清河鄆縣衆千餘人寇頓丘以葬成都王穎為辭載穎主而行與張泓故將李豐等將攻鄴騰曰孤在并州七年胡圍城不能尅汲桑小賊何足憂也及豐等至騰不能守率輕騎而走為豐所害四子虞矯紹確虞有勇力騰之被害虞遂豐豐投水而死是日虞及矯紹并鉅鹿太守崔曼車騎長史羊桓從事中郎蔡

充等又為豐餘黨所害及諸名家流移依鄴者死亡並
盡

劉琨為并州都督屬石勒攻樂平太守韓據請救於琨
而琨自以士衆新合欲因其銳以威勒箕澹諫曰此雖
晉人久在荒裔未習恩信難以法御今內收鮮卑之餘
穀外抄殘胡之牛羊且閉關守險務農息士既服化感
義然後用之則功可立也琨不從悉發其衆命澹領步
騎二萬為前驅琨自為後繼勒先據險要設伏以擊澹

大破之一軍皆沒

王堪為車騎將軍懷帝永嘉三年三月劉元海寇黎陽遣堪擊之王師敗績于延津死者三萬餘人九月堪與平北將軍曹武討劉聰王師敗績堪奔還京師

山簡為征南將軍永嘉四年九月雍州人王如舉兵反於宛殺害令長自號大將軍司雍二州牧大掠漢沔新平人龐寔馮翊人嚴嶷京兆人侯脫等各起兵應之簡及荊州刺史王澄南中郎將杜蕤并遣兵援京師及如

戰於宛諸軍皆大敗王澄獨以衆進至汴口衆潰而歸
李矩為冠軍將軍時劉聰使劉曜陷長安愍帝出降趙
固郭默攻河東至於絳邑右司隸部人盜牧馬負妻子
奔之者三萬餘騎騎兵將軍劉勲追討之殺萬餘人固
默引歸劉頡遮邀擊之為固所敗聰使子粲及劉雅等
伐趙固次于小平津固揚言曰要當生縛劉粲以贖天
子聰聞而惡之李矩使郭默郭誦救趙固屯于維汭遣
耿稚張皮潛濟襲粲貝丘王翼光自厘城覘之以告粲

桀曰征北南渡趙固望聲逃竄彼方憂自固何暇來邪
且聞上身在此自當不敢北視况敢濟乎不須驚動將
士也是夜稚等襲敗桀軍桀奔據陽鄉稚館穀桀壘稚
聞而馳還柵于壘外與稚相持聰聞桀敗使太尉范隆
率騎赴之稚等懼率衆五千突圍趨北山而南劉勲追
之戰于河陽稚師大敗死者三千五百人投河死者千
餘人

梁巨為冠軍將軍劉聰攻河內石勒率騎會之攻巨於

武德懷帝遣兵救之勒留諸將守武德與王桑逆巨於
長陵巨請降勒弗許巨踰城而遁軍人執之勒馳如武
德坑降卒萬餘數巨罪而害之王師退還河北諸堡壁
大震皆請降送任于勒

荀羨為建威將軍攻慕容雋山莊

士留切

拔之斬雋太山

太守賈堅雋青州刺史慕容塵遣司馬悅明救之羨師
敗績復陷山莊諸葛攸又率水陸二萬討雋入自石門
屯于河渚攸部將匡超進據嶠嶽蕭館屯于新柵又遣

督護徐固率水軍三千泛舟上下為東西聲勢雋遣慕容評傅顏等統步騎五萬戰于東阿王師敗績

毛寶為征虜將軍庾亮謀北伐上疏解豫州請以授寶于是明帝詔以寶監揚州之江西諸軍事豫州刺史將軍如故與西陽太守樊峻以萬人守邾城石季龍惡之乃遣其子鑿與其將夔安李萇等五萬人來寇張貉渡二萬騎攻邾城寶求救於亮亮以城固不時遣軍城遂陷寶峻等率左右突圍出赴江死者六千人寶亦溺死

徐龕為征討大將軍褚裒督護裒遣龕伐沛獲偽相支
重郡中二千餘人歸降魯郡山有五百餘家亦建義請
援裒遣龕領銳兵三千迎之龕違裒節度軍次代陂為
石遵將李兗所敗死傷大半龕執節不撓為賊所害

尹奉為寧州刺史李雄據益州寧州李才龐遺起義兵
攻雄將任佗李謙等雄遣其將羅常費黑救之奉遣裨
將姚昂朱提太守楊術援遺戰于登臺昂等敗績術死
之

李釗為越雋太守時王遜為寧州刺史先是釗為李雄所執自蜀逃歸遜復以釗為越雋太守李雄遣李讓任伺攻釗釗自南秦與漢嘉太守王載共拒之戰于溫水釗敗績載遂以二郡附雄

桓宣為平北將軍都督司雍梁三州南陽襄陽新野南鄉四郡軍事梁州刺史庾翼遷鎮襄陽令宣進伐石季龍將李燕軍次丹水為賊所敗翼怒貶宣為建威將軍謝尚為西中郎將督揚州之六郡諸軍豫州刺史假節

鎮歷陽大司馬桓溫欲有事中原使尚率衆向壽春進號安西將軍初苻健將張遇降尚尚不能綏懷之遇怒據許昌叛尚討之為遇所敗收付廷尉時康獻皇后臨朝即尚之甥也特令降號為建威將軍

桓溫為大司馬率衆五萬伐慕容暉前兗州刺史孫元起兵應之溫部將檀玄攻胡陸執暉寧東慕容忠暉遣其將慕容厲與溫戰于黃墟厲師大敗單馬奔還高平太守徐翻以郡歸順溫前鋒朱序又破暉將傅顏于林

渚溫軍大振次於枋頭暉懼謀奔和龍慕容垂曰不然
臣請擊之若戰不捷走未晚也乃以垂為使持節南討
大都督慕容德為征南將軍率衆五萬拒溫使其散騎
侍郎樂嵩乞師於苻堅堅遣將軍苟池率衆二萬出自
雒陽師于潁川外為赴援內實觀隙有兼并之志矣慕
容德屯于石門絕溫糧漕豫州刺史李那率州兵五千
斷溫饋運溫頻戰不利糧運復絕及聞堅師之至乃焚
舟棄甲而退德率勁騎四千先溫至襄邑東伏於澗中

與垂前後夾擊王師大敗死者三萬餘人苟池聞溫班師邀擊于譙溫衆又敗死者萬計

桓豁遷征西大將軍開府及苻堅陷仇池豁以新野太守吉挹行魏興太守督護梁州五郡軍事戍梁州堅陷涪城梁州刺史楊亮益州刺史周仲孫竝委戍奔潰以威略不振所在覆敗又上疏陳謝固辭不拜開府

郗恢為秦州刺史督隴上軍時魏氏強盛山陵危逼恢遣江夏相鄧啓方等以萬人拒之與魏道武戰于滎陽

大敗而還

劉牢之為龍驤將軍時苻堅伐晉敗歸長安牢之屯郵城討諸未服河南城堡承風歸順者甚衆時堅子丕據鄴為慕容垂所逼請降牢之引兵救之垂聞軍至出新興城北走牢之與沛郡太守田次之追之行二百里至五橋澤中爭趣輜重稍亂為垂所擊牢之敗績士卒殲焉牢之策馬跳五丈澗得脫會丕救至因入臨漳集亡散兵復少振牢之以軍敗徵還

劉毅為冠軍將軍毅躡桓立死桓振桓謙復聚眾拒毅於靈溪立將馮該以兵會於振毅進擊為振所敗退次潯陽坐免官尋原之又盧循反於廣州以舟師二萬發姑孰徐道覆聞毅將至建鄴報盧循曰劉毅兵重成敗繫此一戰宜併力拒之循乃引兵發已陵與道覆連旗而下毅次于桑落州與賊戰敗績棄船以數百人步走餘眾皆為賊所虜輜重盈積皆棄之毅走經涉蠻晉飢困死亡至者十二三參軍羊邃竭力營護之僅而獲免

焉

魯宗之為南陽太守時桓振既破江陵自為荊州刺史都督八州宗之自襄陽破振將溫楷于柞溪進屯紀南振聞楷敗留其將馮該守營自率眾與宗之大戰振勇冠三軍眾莫能禦宗之敗績

宋桂陽王義真鎮關中王修既死人情離異無相統一高祖遣將軍朱齡石替義真鎮關中使義真輕兵疾歸諸將競斂財貨多載子女方軌徐行虜追騎且至建威

將軍傳弘之曰公處分亟進恐虜追擊人也今多將輜
重一日行不過十里虜騎追至何以待之宜棄車輕行
乃可以免不從賊追兵果至騎數萬匹輔國將軍蒯恩
斷後不能禁至青泥後軍大敗諸將及府功曹王賜悉
被俘虜義真在前故得與數百人奔散日暮虜不復窮
追義真與左右相失獨逃草中中兵參軍段宏單騎追
尋緣道叫義真識其聲出就之曰君非段中兵邪身在
此宏大喜負之而歸義真謂宏曰今日之事誠無崖略

然丈夫不經此何以知艱難初高祖聞青泥敗未得義
真審問有前至者訪之竝云闇夜奔敗無以知存亡高
祖怒甚剋日北伐謝晦諫不從及得宏啟事知義真已
免乃止

劉粹為征虜將軍文帝元嘉三年討謝晦遣粹弟車騎
從事中郎道濟龍驤將軍沈敞之就粹自陸道向江陵
粹以道濟行竟陵內史與敞之及南陽太守沈道興步
騎至沙橋為晦司馬周超所敗士衆傷死者過半降號

寧朔將軍

臧質為輔國將軍時後魏太武侵徐豫率大眾數十萬
遂向彭城以質為輔國將軍假節置佐率萬人北救始
至盱眙太武已過淮冗從僕射胡崇之領質府司馬崇
之副太子左積弩將軍臧澄之及毛熙祚亦受統於
質盱眙城東有高山質慮魏據之使崇之澄之二軍營
於山上質營城南魏軍攻崇之澄之二營崇之等力戰
不敵眾散竝為後魏所殺又攻熙祚熙祚所領悉北府

精兵幢主李灌率厲將士殺賊甚多隊主周裔之外監
楊方生又率射賊賊垂退會熙祚被創死軍遂散亂其
日質案兵不敢救故三營一時覆沒初仇池之平也以
崇之為龍驤將軍北秦州刺史宋百頃行至濁水為索
虜所攻舉軍敗散崇之及將佐以下皆為後魏所執後
得叛還至是又為後魏所敗馬熙祚司州刺史脩之兄子
也崇之熙祚並贈正員郎澄之三營既敗其夕質軍亦奔
散棄輜重器甲率七百人投盱眙

張永以元嘉二十九年太祖令督冀州青州之濟南樂安太原三郡諸軍事揚威將軍冀州刺史督王玄謨申坦等諸將經略河南攻碯破城累旬不能拔其年八月七日夜虜開門燒樓及攻車士卒燒死及為虜所殺甚衆永即夜撤圍退軍不報告諸將衆軍驚擾為虜所乘死敗塗地永及申坦竝為統府撫軍將軍蕭思話所收繫於歷城獄太祖以屢征無功諸將不可任責永等與思話詔曰虜既乘利方向盛冬若脫敢送死兄弟父子

自共當之言及增憤可以示張永申坦又與江夏王義恭書曰早知諸將如此恨不以白刃驅之今者悔何所及後永為使持節都督南兗徐二州諸軍事南兗州刺史常侍將軍如故時薛安都據彭城請降而誠心不款明帝遣永與沈攸之以重兵迎之加督前鋒諸軍事進軍彭城安都招引索虜之兵既至士卒離散永狼狽引軍還為虜所追大敗復值寒雪士卒離散永脚指斷落僅以身免失其第四子

王玄謨元嘉中守碣破江夏王義恭為征討都督以為
碣破不可守召令還為魏軍所追大破之流矢中臂還
至歷城義恭與玄謨書曰聞因敗為成臂上金瘡得非
金印之徵邪

田益之者弋陽西山蠻也晉安王子勛反遣其將郭確
守弋陽益之起義攻郭確於弋陽以益之為輔國將軍
督弋陽西山事輔國將軍劉劭赴壽陽築長圍始合田
益之率蠻宗萬餘人攻子勛將龐定光於義陽定光遣

從兄文生拒之為益之所破見殺遂圍其城定光求救於子勛子勛以定光父孟虬為司州刺史率精兵五千救義陽并解壽陽之圍常珍奇又自懸瓠率三千人援定光屯軍了水益之不戰望風奔散孟虬乘勝進軍向壽陽

王蘊後廢帝元徽初為東陽太守未之郡值桂陽王休範逼京邑蘊領兵朱雀門戰敗被劄事平除侍中

南齊李安民初仕宋為寧朔將軍隨吳喜沈攸之擊虜

達睢口戰敗還保宿豫淮北既沒明帝勅留安民戍甬
城

陳顯達督平北將軍崔慧景衆軍四萬圍南鄉塢馬圈
城去襄陽三百里攻之四十日虜食盡噉死人肉及樹
皮外圍既急虜突走斬獲千計官軍競取城中絹不復
窮追顯達入據其城遣軍主莊丘黑進取南鄉縣故順
陽郡治也後魏孝文自領十餘萬騎奄至顯達引軍渡
水西據鷹子山築城人情沮敗虜兵甚急軍主崔恭祖

胡松以烏布幔盛顯達數人擔之逕道從分磧山出均水口臺軍緣道奔退死者三萬人左軍將軍張干戰死追贈遊擊將軍顯達素有威聲著於蠻虜至是大損喪焉

裴叔業明帝時為輔國將軍領衆圍渦陽後魏廣陵王率衆拒戰叔業等大敗之斬獲甚衆魏主聞廣陵王敗遣偽都督王肅大將軍楊大眼步騎十餘萬救渦陽叔業見兵盛夜委軍遁走明日官軍奔潰虜追之傷殺不

可勝數日暮乃止叔業還保渦口

胡諧之為衛尉永明八年率禁兵討巴東王子響於江陵兼長史行事臺軍為子響所敗有司奏免官權行軍如故

王珍國為征虜將軍時梁高祖兵至東昏石頭軍主朱僧勇率水軍二千人歸降東昏又遣征虜將軍王珍國帥軍主胡虎牙列陳於航南大路悉配精手利器尚十餘萬人閩人王偃子持白獸幡督帥諸軍又開航背水

以絕歸路王茂曹景宗將角奔之將士皆殊死戰無不
一當百鼓噪震天地珍國之衆一時瓦解投淮死者積
尸與航等後至者乘之以濟於是朱雀諸軍望之皆潰
散義兵追至宣陽門李居士以新亭壘徐元瑜以東府
城降石頭白下諸軍竝宵潰

梁馬仙琕遷司州諸軍事司州刺史魏豫州人白阜生
殺其刺史琅邪王司馬慶曾自號平北將軍推鄉人胡
游為刺史以懸瓠來降高祖使仙琕赴之遣直閣將軍

武會超馬廣率衆為援仙琕進頓楚王城遣副將齊苟
兒以兵二千助守懸瓠魏中山王英率衆十萬攻懸瓠
仙琕遣廣會超等守三關英破懸瓠執齊苟兒遂進攻
馬廣又破廣生擒之送雒陽仙琕不能救會超亦相次
退散魏軍遂進據三關仙琕坐徵還

南康簡王績之子會理為平北將軍武帝太清元年督
衆軍北討至彭城為魏師所敗退歸本鎮

邵陵攜王綸太清二年進位中衛將軍侯景構逆加征

討大都督率衆討景將發高祖誡曰侯景小豎頗習行陣未可以一戰即殄當以歲月圖之綸次鍾離景已渡采石綸乃晝夜兼道旋軍入赴濟江中流風起人馬溺者十二三遂率寧遠將軍西豐公大春新塗公大成等步騎三萬發自京口將軍趙伯超曰若從黃城大道必與賊遇不如逕路直指鍾山出其不意綸從之衆軍掩至賊徒大駭分為三道攻綸與戰大破之斬首千餘級翌日賊又來攻相持日晚賊稍引却南安侯駿以數十

騎馳之賊迴距駿駿部亂賊因逼大軍遂潰綸至鍾山
衆裁千人賊圍之戰又敗乃奔還京口三年春綸復與
東陽州刺史大連等入援至于驃騎洲進位司空臺城
陷綸奔禹穴

羊鴉仁前為司州刺史太清三年三月鴉仁等率所部
入援臺城進軍東府北與賊戰大敗

王質為假節寧遠將軍領東宮兵從貞陽侯北伐及貞
陽敗績脫身逃還侯景於壽陽搆逆質又領舟師隨衆

軍拒之景軍濟江質便退走尋領步騎頓于宣陽門外
景軍至京師質不戰而潰乃翦髮為桑門潛匿人間及
柳仲禮等會援京邑軍據南岸質又收合餘衆從之京
城陷西奔荊州

蕭明武帝兄子封貞陽侯豫州刺史武帝既納侯景詔
明率水陸諸軍趨彭城大圖進取又命兗州刺史南康
嗣王會理總馭羣帥指授方略明渡淮未幾官軍破被
擒盡俘其衆魏帝升門樓觀引見明及諸將帥釋其禁

送于晉陽

楊乾運為信武將軍及達奚武圍南鄭武陵王紀遣乾運率兵援之為武所敗

陳侯安都高祖時為鎮北將軍率眾與周文育西討王琳至武昌琳將樊猛棄城走文育亦自豫章至時兩將俱行不相統攝因部下交爭稍不平軍至郢州琳將潘純於城中遙射官軍安都怒進軍圍之未能尅而王琳至于沌口安都乃釋郢州悉眾往沌口以禦之遇風不

得進琳據東岸官軍據西岸相持數日乃合戰安都等
敗績與周文育徐敬成竝為琳所囚總以一長鎖繫之
置于舳音沓下令所親宦者王子晉掌視之琳下至湓城
白水浦安都等甘言許厚賂子晉子晉乃偽以小船依
舳而釣夜載安都文育敬成上岸入深草中步投官軍
還都自劾詔竝赦之復其官爵

程靈洗為蘭陵太守隨周文育西討王琳於沌口敗績
為琳所拘明年與侯安都等逃歸

吳明徹授都督南北兗青譙五州諸軍事南兗州刺史
會周氏滅齊高祖將事徐兗詔明徹進軍北伐令世子
戎昭將軍員外散騎侍郎慧覺攝行州事明徹軍至呂
梁周徐州總管梁士彥率衆拒戰明徹頻破之因退兵
守城不復敢出明徹仍引清水以灌其城環列舟艦於
城下攻之甚急周遣上大將軍王軌將兵救之軌輕行
自清水淮口橫流豎木以鐵貫直輪遏斷船路諸將聞
之甚恐議欲破堰拔軍以舫載馬馬明戍裴子烈議曰

若決堰下船船必傾倒豈可得乎不如前遣馬出於事
為允適會明徹苦背疾甚篤知事不濟遂從之乃遣蕭
摩訶帥馬軍數千前還明徹乃自決其堰乘水勢而退
軍無其獲濟及至清口水勢漸微舟艦並不得渡衆軍
皆潰明徹窮促乃就執尋以憂憤遘疾卒於長安

蕭摩訶為侍中驃騎大將軍會隋總管賀若弼鎮廣陵
窺覲江左後主委摩訶備禦之任授徐州刺史禎明三
年正月元會徵摩訶還朝賀若弼乘虛濟江襲京口摩

訶請率兵逆戰後主不許及弼進軍鍾山摩訶又請曰
賀若弼懸軍深入聲援猶遠且其壘塹未堅羣情惶懼
出兵掩襲必大尅之後主謂摩訶曰公可為我一決摩
訶曰從來行陣為國為身今日之事兼為妻子後主多
出金帛頒賞諸軍令中鎮軍魯廣達陳兵白土岡居衆
軍之南偏鎮東大將軍任忠次之護軍將軍樊毅都官
尚書孔範次之摩訶軍最居北衆軍南北亘三十里首
尾進退各不相知初未戰時賀若弼將輕騎登山觀望

形勢及見衆軍因馳下置陣廣達首率所部進薄弼軍
屢却俄而復振更分軍趣北援諸將孔範出戰兵交而
走諸將支離陣尚未合騎卒潰散駐之弗止摩訶無所
用力馬為隋軍所執

南康嗣王方泰後主禎明初為侍中三年隋師濟江方
泰與忠武將軍南豫州刺史樊猛左衛將軍蔣元遜領
水軍於白下往來斷遏江路隋遣行軍元帥長史高頴
領船艦汭流當之猛及元遜竝降方泰所部將士離散

乃棄船走及臺城陷與後主俱入關

呂肅為南康太守時隋來伐陳肅將兵據巫峽以五條鐵鎖橫江肅竭其私財以充軍用隋將楊素奮兵擊之四十餘戰爭馬鞍及磨刀澗守險隋軍死者五千餘人陳人盡取其鼻以求功賞既而隋軍屢捷獲陳之士三縱之肅乃遁保延州別帥廖酉寵領大舫請降欲燒隋艦更決死一戰於是有五黃龍備衆色各長十餘丈驤首連接順流而東風浪大起雲霧晦冥陳人震駭不覺

火自焚隋軍乘高艦張大弩以射之陳軍大敗風浪應時頓息肅收餘衆東走

後魏宿沓于為虎威將軍道武天興五年正月慕容熙遣將寇遼西于等拒戰不利棄令支而還

刁雍為建義將軍率衆二萬進屯固山雍從弟彌時亦率衆入京口規共討宋高祖宋高祖遣兵破之六月雍又侵宋青州雍敗乃收散卒保於馬耳山又為宋州軍所逼遂入大鄉山

奚斤為司空征赫連昌昌弟助興先守長安聞昌敗遂走入上邽斤追之不及而還詔斤班師斤上疏曰赫連昌亡保上邽鳩合餘燼未有盤據之資今因其危滅之為易請益鎧馬平昌而還太武曰昌亡國叛夫擊之勞傷將士且可息兵取之不晚斤抗表固執乃許之給斤萬人遣將軍劉拔送馬三千匹與斤進討安定昌退保平涼斤屯軍安定以糧竭馬死遂深壘自固監軍侍御史安頡擊昌擒之昌衆復立昌弟定為主守平涼斤

自以元帥而擒昌之功不在已深恥之乃捨輜重輕齎三日糧追定於平涼宗正娥清欲尋水而往斤不從自北道邀其走路定衆將出會一小將有罪亡入賊具告其實定知斤軍無糧乏水乃邀斤前後斤衆大潰斤及娥清劉拔為定所擒士卒死者六七千人後太武克平涼斤與娥清等得歸免為宰人使負酒食從駕還京師以辱之

丘堆為太僕太武世征赫連昌堆與常山王素督步兵

三萬人為後軍昌戰敗南奔太武遣堆與宗正娥清率
五千騎略地關右昌貳城守將堅守不下堆與清攻拔
之詔堆班師而宜城王奚斤表留堆等進平昌許之堆
斤合軍與昌相拒擊士馬乏糧堆與義兵將軍封禮督
租於民間士卒暴掠為昌所襲敗績堆將數百騎還城
本紀神麈元年司空奚斤討赫連定於平涼馬髦嶺為
定所擒丘堆先守輜重在安定聞斤敗棄甲東走長安
帝聞大怒詔
安頡斬堆

盧淵為儀曹尚書孝文時南齊雍州刺史曹虎遣吏請

降孝文以淵為使持節督前鋒諸軍逕赴樊鄧淵至葉具知曹虎譎詐之間兼陳利害詔淵進取南陽淵以兵少糧乏表求先攻赭陽以近葉倉故也孝文許焉乃進攻赭陽齊將垣廐生來救淵素無將略為賊所敗坐免官爵為民

李佐為安南將軍副大司馬咸陽王禧為殿中將軍時孝文南討佐尋被勅與征南將軍城陽王鸞安南將軍盧淵等攻赭陽各不相節度諸軍皆坐甲城下欲以不戰

降賊佐獨勒所部晨夜攻擊屬齊明帝遣其太子右衛
率垣歷生衆來援咸以勢弱不敵規欲班師佐乃簡騎
二千逆賊為賊所敗坐徙瀛州為民

蕭寶夤齊明帝之子以梁武克建業殺其兄弟被害來
奔宣武除為鎮東將軍及中山王英南伐寶夤又表求
征乃授使持節鎮東將軍別將以繼英配羽林虎賁五
百人與英頻破梁軍乘勝遂攻鍾離淮水汎溢寶夤與
英狼狽引退士卒死沒者十四五有司奏寶夤守東橋

不固軍敗繇之處以極法詔曰寶黃因難投誠宜加矜貸可恕死免官削爵還第延昌四年遷撫軍將軍冀州刺史及大乘賊起寶黃遣軍討之頻為賊破臺軍乃滅之後於孝昌中為司空公出師既久兵將疲弊是月大敗還雍州仍停長安收聚離散有司處寶黃死罪詔恕為民

楊昱為安東將軍蕭寶黃等敗於關中以昱兼七兵尚書持節假撫軍將軍都督防守雍州昱遇賊失利而反

盧昶為都督時梁將馬仙琕率眾攻圍朐城戍主傅文
驥嬰城固守以滎陽太守趙遐為別將與劉思祖等救
之次於鮑音口去城五十里夏雨頻降厲涉長驅將至

朐城仙琕見遐營壘未就徑來逆戰思祖率彭沛之眾
望陣奔退遐孤軍奮擊獨破仙琕斬其直閣將軍軍主
李魯生仙琕乃分軍於朐城之西阻水列柵以圍固城
遐身自潛行觀水深淺結草為筏啣枚夜進破其六柵
遂散固城之圍進救朐城昶率大軍繼之未幾而文驥

力竭以城降賊衆軍大敗袒棄其節輕騎而走唯遐獨握節而還遐坐失利免官

河間王琛孝明時為秦州刺史時東益南秦二州氐反詔琛為都督進討氐羌大被摧破後又為大都督與長孫稚討鮮于修禮於鍾山琛與稚前到呼沱稚未欲戰而琛不從行達五鹿為修禮邀擊琛不赴之賊總至遂大敗稚與琛竝除名

章武王融宣武初為河南尹以聚斂削爵時汾夏山胡

叛逆連結正平平陽詔復融前封征東將軍持節都督
以討之融寡於經略為胡所敗

薛蠻為持節光祿大夫假安南將軍西道別將時莫折
念生反於秦州遣其別帥卜胡王慶雲等寇涇州孝明
以蠻與伊益生等討之進及平涼郡東與賊交戰不利
蠻等退還

安樂王鑿為秘書監孝明孝昌元年徐州刺史元法僧
據城反害行臺高諒自稱宋王遣其子景仲歸於梁梁遣

其將胡虎牙成景雋元略等率衆赴彭城詔鑿討之鑿於彭城南擊元略大破之盡俘其衆既而不備為法僧所敗梁武遣其豫章王綜入守彭城法僧擁其僚屬守令兵戍及鄆邑士女萬餘口南入

畢聞慰為都督安樂王鑿軍司馬元法僧反聞慰與鑿攻之為法僧所敗奔還京師被劾遇赦免

崔延伯為征西將軍孝昌元年三月討万俟醜奴大敗於涇州戰歿

源子恭為大都督孝莊建義元年爾朱兆寇丹谷都督
崔伯鳳戰歿都督羊文義史五龍降兆子恭奔退

盧仝為撫軍將軍營州城民就德興反詔仝以本將軍
為幽州刺史兼尚書行臺慰勞之仝慮德興難信勒眾
而往為德興所擊大敗而還

鹿愈音愈為使持節兼尚書右僕射東南道行臺至東郡

值爾朱仲遠陷西兗向滑臺詔與都督賀拔勝等拒仲
遠軍敗還京

崔暹為瀛州刺史武川鎮反詔暹為都督隸大都督李崇討之暹違崇節度為賊所敗單騎潛還

北齊慕容儼神武時為揚州行臺監蕭莊王琳軍與陳將侯瑱侯安都戰於蕪湖敗還

竇泰從神武西討令泰自潼關入泰至小關為周文帝所襲眾盡沒泰自殺

李希光為安南將軍西兗州刺史文宣責陳武帝廢蕭明命儀同蕭軌率希光東方老裴延起王敬寶步騎數

萬伐之以天保七年三月渡江襲克石頭城五將名位
相侔延起以侍中為軍司蕭軌與希光竝為都督軍中
抗禮不相服御競說謀略動必乖張頓軍丹陽城下值
淋雨五十餘日及戰兵器竝不堪施用故致敗亡將帥
俱死士卒得還者十二三所沒器械軍資不可盡計

宇文述為扶餘道將軍煬帝征高麗述與九軍至鴨綠
水糧盡議欲班師諸將多異同述又不測帝意會乙支
文德來詣其營述先與光祿大夫于仲文俱奉密旨令

誘執文德既而緩縱文德逃歸述內不自安遂與諸將渡水追之時文德見述軍中多飢色欲疲述衆每鬪便北述一日之中七戰皆捷既恃驟勝又內逼羣議於是遂進東濟陸水去平壤城三十里因山為營文德復遣使偽降請述曰若旋師者當奉高元高麗之君朝行在所述見士卒疲弊不可復戰又平壤險固卒難致力遂因其詐而還衆半濟賊擊後軍於是大潰不可禁止九軍敗績一日一夜還至鴨綠水行四百五十里初渡遼九軍

三十萬五千人及還至遼東城唯二千七百人帝大怒以述等屬吏至東都除名為民先是仲文率衆至鴨綠水述以糧盡欲還仲文議以精銳追文德可以有功述固止之仲文怒曰將軍提十萬之衆不能破小賊何顏以見帝且仲文此行也固知無功矣述因厲聲曰何以知無功仲文曰昔周亞夫之為將也見天子軍容不變此決在一人所以功成名立今者人各有心何以赴敵初帝以仲文有計畫令諸軍諮稟節度故有此言繇是

述等不得已而從之遂行東至薩水宇文述兵餒退歸師遂敗績帝以屬吏諸將皆罪於仲文帝大怒釋諸將獨繫仲文憂恚發病困篤方出之卒於家

崔弘昇為涿郡太守遼東之役檢校左武衛大將軍事至平壤與宇文述等同敗績奔還發病而卒

王辯為虎賁中郎將時崔讓寇徐豫辯進頻擊走之讓尋與李密屯據雒口倉辯與王世充討密阻雒水相持經年辯率諸將攻敗密因薄其營戰破外柵密諸營已

有潰者乘勝將入城世充不知恐將士勞倦於是鳴角收兵翻為密徒所乘官軍大潰不可救止

魏蘭根為河北行臺定州率募鄉曲欲防井陘時爾朱榮將侯深自范陽趨山中蘭根與戰大敗

尉破胡為開府儀同三司後主武平四年破胡長孫洪略等與陳將吳明徹戰於呂梁南大敗之破胡走以免洪略戰沒遂陷秦涇二州

後周獨孤信為驃騎大將軍與馮翊王入雒陽賴豫襄廣

陳留之地竝相繼款附東魏將侯景等率衆圍雒陽信據金墉城旬有餘日及太祖至瀍東景退走信為右軍戰不利東魏遂有雒陽

齊王憲太祖第五子也時李徹從武帝拔晉州及帝班師徹與憲屯雞棲原齊後主以大軍至憲引兵西上以避其鋒遣其驍將賀蘭豹子率勁騎躡憲戰於晉州城北憲師敗績與楊素宇文慶等力戰憲賴以獲全

王褒初仕梁為僕射周軍征江陵梁元帝授褒都督城

西諸軍事褒本以文雅見知一旦委以總戎深自勉勵
盡忠勤之節被圍之後上下猜懼元帝唯於褒深自委
信乃命褒與朱買臣率衆出宣陽之西門與周師戰買
臣大敗褒督進不能禁乃貶為護軍將軍

隋韓洪高祖時為代州總管仁壽元年突厥達頭可汗
犯塞洪率蔚州刺史劉隆大將軍李樂王拒之遇虜於
恒安衆寡不敵洪四面搏戰身被重創將士沮氣虜悉
衆圍之矢下如雨洪偽與虜和圍少解洪率所領潰圍

而出死者大半殺虜亦倍洪及藥王除名為民隆竟坐
死

馮昱開皇初為行軍總管屯乙弗泊以備胡突厥數萬
騎來掩之昱力戰累日衆寡不敵竟為虜所敗亡失數
千人殺虜亦過當

薛世雄為左衛大將軍涿郡留守未幾李密逼東都中
原騷動煬帝詔世雄率幽薊精兵將擊之軍次河間營
於郡城南河間諸縣竝集兵依世雄大軍為營欲討竇

建德建德將軍來河口自選精銳數百夜來襲之先犯
河間兵潰奔世雄營時遇霧霧晦冥莫相辨識軍不得
成列皆騰柵而走於是大敗世雄與左右數十騎遁入
河間城慙恚發病歸于涿郡未幾而卒

段達為左翊衛將軍煬帝幸江都宮詔達與太府卿元
文郁留守東都李密據雒口縱兵侵掠城下達與監門郎將
龐玉武牙郎將霍舉率內兵出禦之頗有功遷左驍衛大
將軍王充之敗也密復進據北邙來至上春門達與判

左丞郭大懿尚書韋津出兵拒之達見賊盛不陣而走
為密所乘軍大潰於陣繇是賊勢日盛

王世充為江都守時李密攻陷興雒倉進逼東都官軍
數却光祿大夫裴仁基以武牢降于密煬帝惡之大發
兵將討焉發中詔遣充為將軍於雒口以拒密前後百
餘戰互有勝負充乃引軍渡雒水逼倉城李密與戰充
敗績赴水溺死者萬餘人時天寒大雪兵士既渡水衣
皆濡濕在道凍死者又數萬人比至河陽纔以千數充

自繫獄請罪



欽定四庫全書

冊府元龜
卷四百四十二

三十一

冊府元龜卷四百四十二

欽定四庫全書

子部
冊府元龜卷四百四十三

詳校官中書臣丁崇祚

侍讀臣孫球覆勘

總校官庶吉士臣何思鈞

校對官中書臣孫梅

謄錄監生臣符國琛

欽定四庫全書

冊府元龜卷四百四十三

宋 王欽若等撰

將帥部

敗衄第三

唐楊恭仁仕隋為河南道大使時天下大亂行至譙郡
為朱榮所敗奔還江都

竇軌封贊皇公高祖武德元年九月軌擊薛仁果反為
所敗

王老德為右驍衛將軍武德二年正月老德捕山賊張子惠為賊所敗徵還

裴寂為尚書右僕射武德二年宋金剛寇并州姜寶誼李仲文相次陷沒寂自請行因授晉州道行軍總管得以便宜從事軍次介休與金剛相遇保於度索原營乏水賊斷其澗路繇是危迫欲移營就水賊因犯之師遂大潰死散略盡寂一日一夜馳至晉州自晉以東城堡一時陷賊寂上表陳謝高祖慰謝之令鎮撫河東之地

會呂崇茂以夏縣舉兵反引金剛為援率兵擊之復為所敗

永安王孝基為鴻臚卿時呂崇茂叛孝基以兵攻之于筠勸孝基急圍城外援不至自相疑阻計日可平孝基將從之獨孤懷恩陰懷反計不欲崇茂早平乃說孝基曰筠言非也崇茂據城王之攻具若引師前進必不能尅宋金剛在近表裏相助一敗塗地悔無及矣為王計者不若頓兵營攻具待秦王破賊則崇茂自孤可為不

戰以屈人者也孝基又然之於是停營造攻具會宋金剛遣其將尉遲敬德卒至孝基表裏受敵於是大敗

李世勣為右武衛大將軍武德四年十二月世勣與劉黑闥戰於宋州我師敗績

張公瑾為并州道行軍總管武德八年公瑾與突厥戰於太谷我師敗績鄆州都督張德致死之夔州都督行軍長史中書侍郎溫彥博為虜所執

薛仁貴為邏娑道行軍大總管高宗咸亨元年八月仁

貴及副大總管阿史那道真郭待封等為吐蕃大將論
欽陵所襲大敗於大非川

李敬玄為中書令為洮河道行軍大總管儀鳳三年九
月與工部尚書左衛大將軍劉審禮統兵以討吐蕃戰
于青海之上王師敗績時審禮領前軍深入頓于濠所
既為賊所擊敬玄按兵不救審禮遂沒于陣敬玄收軍
却出頓于承風嶺阻泥溝不敢動賊屯于高岡以壓之副
將左領軍員外將軍黑齒常之夜率敢死之士五百人

進掩賊營賊遂潰亂自相蹂踐死者三百餘人吐蕃大
首領拔地沒按軍宵遁敬玄乃擁其餘衆還鄯州使郎
將衛山馳驛奏其覆敗之狀高宗怒不見之調露二年
七月吐蕃大將贊婆及素和貴等率衆三萬進寇河源
屯兵于大非川敬玄為河西鎮撫大使敬玄統衆與賊
戰于湟川官軍敗績

蕭嗣業為鴻臚卿調露元年突厥反叛詔嗣業領軍將
軍苑大智千牛將軍李景嘉等討之嗣業等初戰頻捷

遂不設備俄逢大雪兵寒凍列營不整賊徒乘夜逼之
嗣業窘迫拔營而走衆遂大潰為賊所敗死者不可勝
數大智景嘉引步兵且行且戰奔單于都護府

曹懷舜為定襄道副總管討突厥史伏念懷舜及裨將
竇義昭王孝誠等前軍先往為賊所紿聲言伏念溫傳
等在黑沙北各有二十騎以下煮人肉而食之可單馬
而擒也懷舜等乃留老弱於瓠盧泊晨炊尋食率輕銳
倍道往襲之既至黑沙人馬疲頓竟不見賊會延陁部

落西行詣伏念遇懷舜軍乞降懷舜等雖不獲伏念而喜得延陀遂按兵而旋行至碧淶泊軍始為營營內忽有泉水大如車輪又遇大風飄折懷舜寢帳衆皆惡之迴至長城之北與溫傳相遇列陣而戰交綏而退時裴行儉頓兵於代州之陘口縱反間說伏念與溫傳漸相猜貳遣別帥擊伏念敗之伏念既退遂與懷舜等相遇於橫水懷舜及裨將李文陳劉敬同竇義昭凡四軍合為方陣且行且戰經一日賊因使風先擊敬同之營營

中潰亂懷舜義昭遂棄其軍輕騎奔雲州兵士隨而大奔為賊所乘死者不可勝數皆南首而仆懷舜與敬同復收散卒斂財帛與伏念和殺牛而盟乃領其餘眾以歸伏念遂北遁

淳于處平為陽曲道總管則天垂拱元年四月癸未突厥寇代州處平及中郎將蒲英節率兵赴救行至忻州與賊戰大敗死者五千餘人

饜寶壁為右監門衛中郎將則天垂拱三年十月寶壁

討突厥骨咄祿元珍寶壁見黑齒常之擊破突厥於黃
花堆又表請窮追餘寇制常之與寶壁計議遙為聲援
寶壁以為破賊在朝夕貪功先行又令人出塞二十餘
里覘候見元珍等部落皆不設備遂率眾掩襲之既至
又先遣人報賊令其嚴備出戰時寶壁下有精兵一萬
三千人遂為所敗全軍盡沒單騎遁歸論者尤之寶壁
坐此伏誅

王孝傑為清邊道大總管萬歲通天元年三月孝傑及

副總管婁師德與吐蕃首領論欽陵贊婆戰於素羅汗山官軍敗績孝傑免官師德貶為原州員外司馬

薛訥為并州大都督府長史兼左衛大將軍玄宗開元二年契丹奚及突厥等連和屢為邊患訥建議請出師討之詔與左監門將軍杜賓客定州刺史崔宣道等率衆二萬人出檀州道以討契丹杜賓客及姚崇皆以為不可訥建此議時帝方欲威服四夷特令訥同紫微黃門三品總兵出擊議者遂息六月師至灤河盡為契丹

所覆脫身走免歸罪於崔宣道及蕃將李思敬等八人
詔皆斬之特原杜賓客之罪訥官並削除

王昱為益州長史開元二十六年九月昱率兵攻吐蕃
安戎城為賊所拒官軍大敗棄甲而遁兵士死者數千
人

鮮于仲道為蜀郡長史兼御史中丞劔南節度等使天
寶十載仲道討蠻於雲南瀘水為蠻所敗死者六萬人
安祿山為河東節度使天寶十一載祿山大舉兵討契

丹領衆五萬人使人於奚及謂之曰今契丹背盟我將討之汝豈不助我乎奚及遂以驍騎二千從之祿山使前驅使人鄉導屬連雨十餘日祿山行至護真河誓衆曰兵法疾雷不及掩耳又曰先人有奪人之心今久雨復去賊尚遠若倍道趨程賊不虞我之至破賊必矣軍令嚴促遂晝夜行日三百里奄至契丹牙帳契丹大駭祿山使人持一繩盡縛契丹皆欲生得以歸是時弓弩盡濕弛而不張大將軍何思德請見曰兵士遠來倍道

疲頓用之必不可不如少憩張其勢而脅之不三日必降祿山大怒欲斬之以令三軍思德請效死於先鋒思德形貌類於祿山契丹望見攢槍突而取之須臾支解其形咸謂殺得祿山賊衆增勇奚及背祿山附契丹并力夾攻殺傷略盡祿山被矢中鞍橋替履俱墜獨以麾下二十騎走上山未及墜坑中男慶緒麾下將孫孝哲扶出之且戰數十里會夜追騎解遂投平盧城城中驍將史定方領精騎三千出追寇契丹知有救遂解圍而

去祿山得脫時史思明亦隨祿山至護真河屬連雨十
餘日祿山已戰大敗祿山匹馬脫走得免投師州手殺
左賢王哥解將軍河東兵馬使魚承先將推過自解思
明恐其見殺逃入山谷中二十許日收得散卒七百人
祿山挺身歸平盧計無所出恐人乘其危思明將散卒謁
見祿山祿山大喜投袂而起握思明手曰謂汝已沒矣
不圖見汝吾復何憂思明退而告人曰向使早出隨哥
解等已死矣方知進退存亡在其時也賊績攻圍師州

守捉使劉客奴伏於莽中得免求救於祿山使思明擊之賊走

高仙芝為右羽林將軍天寶十四載十一月安祿山反於范陽驅幽并突騎十萬兵向闕以誅楊國忠為名玄宗乃命仙芝訓練四軍驍雄兼募長安武力之士共二十萬以京兆牧榮王琬為元帥東擊祿山又旋命四鎮節度御史大夫封常清先往河雒扞守東都十二月常清為祿山敗于武牢丙申賊師至雒分兵燒建春門門

者失守賊至雒城以劔士夾道長驅至天津橋我師大潰常清以麾下十數騎脫身走入苑所過命其人斷其水而追者不及遂至陝郡而仙芝領大軍初至東方欲進師會常清軍敗又欲廣其賊勢以雪已常清先為仙芝麾下士素見親信相對泣以謀班師常清遂謂仙芝曰祿山包藏禍心向十年矣一朝興幽并勁卒以亂中原將軍持烏合之衆驅市人以戰今人主尚在長安去此非遠儻小不利搖動京城將軍豈不重此一舉乎常

清為將軍計不如退守潼關仙芝然其言即日班師士卒等棄甲遺弓矢於路夜走保潼關朝廷大駭辛丑詔皇太子總統六軍親征寇逆以河西隴右節度御史大夫哥舒翰為皇太子先鋒副元帥領河隴兵并仙芝舊卒二十萬鎮潼關有詔徵天下兵四面齊舉將收雒陽賊將崔乾祐叩關請挑戰哥舒翰以四面徵兵未集而不與戰國忠素與哥舒翰不協因言逗遛不進玄宗數使催兵出關十五載六月乙酉哥舒翰領兵馬步十五

萬賊將崔乾祐會戰初哥舒翰造氈車以氈蒙其車以馬駕之畫以龍虎之狀五色相宣又以金銀飾其畫獸之目及爪將衝戰馬因其驚駭擬從而犄角攢戈夾而逐之賊知其計積薪芻於隘候氈車至順風縱火焚之駕馬奔駭燒氈車及薪芻烟焰昏黑兩軍不相辨我師謂賊軍在烟焰之中遂集弓弩併力射之賊軍抽退盡日矢盡方覺無賊我師從關門六七里路狹北臨黃河南是古岸排蹴進不得賊抽軍從南山設疑曳柴揚塵

以同盧諸鎮習險之衆直逼黃河古岸橫截我師我師
敗績沉河而死十有二三哥舒翰在河北高阜上觀軍
陣進退之勢于時有搬糧船在河北岸左右言取船渡
兵士可得遂令將船百餘隻到河南岸渡人登船爭渡
者不可勝數舟中之指可掬每滿即沉如是登船沉者
數十渡餘軍盡散走還入關先時于關門穿三道壑澗
二丈深丈餘師敗之際前後奔蹙人馬相推入坑須臾
壑滿兵士踐人馬之上而得過入關辛卯潼關不守河

東防禦使呂崇賁華州防禦使魏仲犀馮翊防禦使李
彭州上維防禦使楊黯皆棄郡走所在兵將解辮而散
其日翰大將鉗大福蘇法鼎管崇嗣等於靈寶西原與
賊軍戰聞潼關失守亦各奔散西走入關翰戰敗垂淚
入關至西驛署榜招其散卒欲收其餘燼却守潼關為
帳下士蕃將火拔歸仁領部落百騎圍驛執翰將降祿
山會賊將鄧季陽田乾真各領數百騎至便領翰將歸
祿山其日副將高元蕩等一十五人同被執送田乾真朝

廷聞之大駭初翰為隴右節度使遘風疾廢于家祿山之叛藉其威名故有是拜至軍中不能親庶務委政於軍司馬田良丘良丘復不敢專斷教令不一頗無部伍其將王思禮李承光爭長不叶人無鬪志及戰敗為歸仁所執將東行翰乃作突厥語問其故對曰欲將相公出關翰曰何也歸仁曰相公不見封常清高仙芝乎常清東京戰敗仙芝却保潼關竝斬於此相公今將國家二十萬衆一舉而喪敗我恐相公還死於此翰曰吾寧

效仙芝死於此豈能偷生見祿山乎汝捨我歸仁不從
執翰送祿山監察御史高適為翰掌書記在潼關及翰
敗適自駱谷南奔及河池郡遇玄宗幸蜀上疏論潼關
敗亡之事其略曰僕射哥舒翰忠義感激臣常知之然
疾病沉頓智力俱竭監軍事李大宜與將士約為香火
使娼婦彈箜篌琵琶以此為樂糲稍飲酒不卹軍務蕃
軍及秦隴武士盛夏五六月於赤日之中食倉米飯欲
勇戰安可得乎故有望敵散亡臨陣翻動萬全之地一

朝而失南陽之軍魯炤何履光趙國珍各皆持節監軍
等數人更相用事寧有是戰而能必勝哉臣與國忠固
爭終不見納陛下因此履巴山劔戟之險西幸蜀中避

其蠱毒未足為恥

哥舒翰統兵討安祿山次于靈寶縣之西原八月與賊交戰官軍南迫險

峭北臨黃河崔乾祐以數千人先據險要翰及田良丘等浮船中流以觀進退謂乾祐兵少輕之遂促將士令進爭路擁塞無復隊伍午後東風急乾祐以草車數十乘縱火焚之煙焰亘天將士掩面開目不得因為凶徒所乘王師自相擠墜于河其後者見前軍陷敗悉潰填委于河北死者數萬人號叫之聲振天地縛器械以槎為火拔歸仁執降于賊祿山謂之曰汝常輕我今日

如何翰懼俯伏稱肉眼不識陛下遂至於此陛下為撥亂主今天下未平李光弼在土門來瑱在河南魯炤在南陽但留臣以尺書招之不日平矣祿山大喜遂偽署翰司空令作書招光弼等諸將報書皆讓翰不死節祿山知事不諧遂閉翰於苑中潛殺之

魯炤為南陽太守天寶十五載正月安祿山犯宮闕詔以魯炤兼御史大夫充南陽節度使率嶺南黔中山南東道子弟五萬人屯葉縣北拒賊炤遂以渚水之南堅以自固表請薛愿為潁川長史訓兵固守五月丁巳炤與賊將武令珣戰于葉縣王師敗績陷南陽炤攜百姓

數千人奔于順陽川

房瑄肅宗時為相至德元年十月瑄抗疏請兵一萬人自為帥以收京師詔許之以兵部尚書王思禮為副分為三軍使楊希文將南軍自宜壽入劉哲將中軍自武功入李光進將北軍自奉天入庚子房瑄自將中軍為先鋒師次便橋辛丑二軍先遇賊陣於陳濤王師敗績時瑄用車二千乘以馬步夾之為乘車之戰賊順風揚塵鼓譟牛皆振駭因縛草縱火焚之人畜大亂故

敗癸卯瑄自將南軍又戰不利楊希文劉哲降於賊
瑄與幕府偏裨等奔赴行在內袒請罪帝併宥之

郭英又為關西節度兵馬使至德二年三月賊寇武功
東原英又與賊戰為賊所敗流矢中頤而走右廂兵馬
使王難德軍於西原觀之不救棄甲而遁

郭子儀為朔方節度使至德二年五月子儀大舉進軍
與賊將安守忠戰於西京城西清渠王師敗績初子儀
軍於瀟音律
余切水之西守忠軍於清渠之北越七日而王

師不進賊令軍中以木成桴而來逼我軍子儀使壯士持陷刀列於岸上以俟之賊有攀岸而上者漸斬殺之賊軍小却守忠偽遁使人揚言曰賊走矣子儀喜悉師以逐之賊有驍銳九千為長蛇陣守忠謂安太清曰吾為蛇首子為蛇尾遂令領四千人從延平門路入命太清四千人從金光路入以一千趣平川當官軍而橫擊賊首尾之陣翼張前後奔衝我師不虞賊之暴至遂大潰判官殿中侍御史韓液監軍使內侍孫知古皆為賊

生得軍資器械竝委棄之子儀退守武功乾元二年三
月壬申子儀與河東節度李光弼關內節度僕固懷恩
河北節度王思禮河南節度許叔冀南陽節度魯炆江
東節度李廣琛興平節度李奐平盧節度董秦等九節
度與逆賊安慶緒戰于相州城下官軍不利諸將皆解
圍潰散初慶緒保相州子儀等合勢圍之引漳水灌其
城三面自冬及春賊糧盡勢窮降在朝夕慶緒求救於
史思明發魏州來救李光弼王思禮許叔冀魯炆遇賊

先戰殺傷相半魯炤中天子儀軍承後陣未及整忽心有
大風揚砂拔木天地晝晦咫尺不相辨師人驚潰官軍
大奔棄甲仗器械委積道路子儀等收兵斷河陽浮橋保
東京士庶驚恐散投山谷留守崔圓河南尹蘇震詹事

高適汝州刺史賈至百餘人南奔襄鄧迴兵剽劫官吏

不能止旬日方定

乾元初子儀統朔方之師與河東節度李光弼等九將兵十五萬進討史

思明之遺寇十月渡河下衛州十一月圍安慶緒於相州時以子儀光弼皆是元勳重將難相統屬故不立元帥但以中官魚朝恩為觀軍容宣慰使是以衆軍進退無所承稟自冬徂春不能立功正月始詔子儀為攻城

副元帥光弼為野戰副元帥又引漳水灌之城深水深數尺會史思明自范陽率眾南下光弼子儀等軍逆擊於鄴南思明敗而賊將李歸仁犯我軍亦敗思明敗而北我師敗而南九將之兵多走本鎮山東之地盡沒子儀至東都而止

李光弼為副元帥上元元年十二月戊寅光弼等為逆賊史思明所敗初思明潛遣間諜說官軍曰雒中將士皆幽朔人也久戍思歸士多不睦陝州觀軍容使內侍魚朝恩聞之以為然乃告光弼及諸節度僕固懷恩衛伯玉等曰可速出軍盡掃殘寇光弼等然之乃帥兩道

齊進以收東京軍次北邙山光弼懷恩列陣以待之思
明至賊奪高原以長槍七百人令壯士執刀隨其後以
驅之令衝我軍交鋒而潰士卒咸棄甲奔敗魚朝恩衛
伯玉乃退保陝州光弼僕固懷恩等竝走聞喜初大軍
發也光弼以李抱玉留守河陽至是抱玉以糧絕衆寡
亦棄城而走朝廷憂之益兵而鎮陝州

左倫為秦州防禦使上元二年吐蕃党項寇邊救軍不
至倫頻敗勦連賊巴州長史思州務川縣尉

鮑防為河東節度留後太原尹兼御史大夫代宗大曆十二年正月回紇寇太原防與回紇戰于曲陽我師敗績死者萬餘人

馬燧為河東節度使德宗建中三年田悅據魏博叛燧及澤潞節度李抱真諸軍同討魏城未拔幽州朱滔鎮州王武俊皆反聯兵救悅詔遣邠寧節度李懷光統朔方兵步騎一萬五千同討田悅懷光勇而無謀至魏城之日營壘未設因與滔等大戰于恆山為滔等所敗悅

決水灌燧等軍燧兵屈糧少遂與諸軍退軍于魏縣
張伯儀為荆南節度使李希烈叛逆建中四年詔伯儀
與賈耽張獻甫收安州伯儀率其銳卒營於城下令裨
將史神福鄧國清禦希烈將崔暉纔交鋒賊衆偽遁神
福等追賊伏兵發官軍大失利伯儀中流矢者二失其
所持節為追騎所及追者奮刀伯儀拔佩刀禦之兩刃
相擊不下而免南投於漢得野人船而達沔州判官侍
御史李穗及大將十餘人皆沒其潰兵二千餘人先奔

至江陵號於庭伯儀妻魏氏遽出勞勉悉以其家財帛
二千餘疋分給之皆感悅而退伯儀得散卒數百人經
旬達鎮

李勉為江南都統時李希烈圍襄城詔勉發一萬人救
之又遣神策將劉德信領三千人同為應援勉上表言
襄城雖急許州正虛今若將兵直抵許州則襄城圍自
解於是不待復命遂令大將唐漢臣等徑趨許州未到
數十里奉詔詰責勅令旋旆二將惶懼迴軍行無斥候

軍為賊將李克誠伏兵所擊敗於危澗殺傷大半器械輜重盡為賊所虜漢臣走汴州德信走汝州勉懼東郡危陷又使其將李堅華領四千人守東都軍過復為賊所隔汴州自此不振襄城亦浸危急

韓全義為行營招討使貞元十六年正月常州易定陳許河陽各進兵馬討吳少誠戰皆不利而退易定監軍判官劉孝勤為賊所擒五月全義與吳少誠將吳秀吳少陽張國寧等戰于激水南廣利城官軍敗衄七月全

義頓軍於五樓行營為賊所乘大潰全義與都監軍賈
英秀賈國良等夜退保守澠水縣而軍全義懼其凌突
直趨陳州

嚴綬為山南東道節度使憲宗元和十年正月詔討淮
西吳元濟二月甲辰綬兵敗于磁丘初綬乘小勝不設
備賊夜逼之綬乃大北退五十餘里馳入唐州而守焉
李光顏為忠武軍節度使元和十年八月光顏討淮西
兵敗於時曲

高霞寓為唐鄧節度使元和十一年六月討淮西兵敗於鉄城走新興柵自諸軍征討勝負皆不以實奏多增其殺獲及是霞寓大敗不可掩始上聞中外恟駭已酉賊圍霞寓於新興柵監軍使李義誠突圍入唐州取兵以救霞寓會賊亦解去霞寓退保于唐州先是淮西用師於山東道特割三州之地全付霞寓用益聲勢霞寓雖稱勇敢素昧機畧至於統制尤非所長及達所部乃率兵趣蕭坡與賊決戰既小勝又進至文武柵賊軍

佯敗而走霞寓逐之不已因為伏兵所掩王師大衄戮
十七八霞寓僅以身免坐是貶歸州刺史

渾鎬為義武軍節度使憲宗命諸道出師討王承宗鎮
定相去九十里元和十一年冬鎬率全師壓賊境而軍
離賊壘三十里鎬計慮不周但耀兵鋒無所控制賊乃
分兵潛入定州界焚燒驅掠鎬怒進攻賊壘交鋒而敗
師徒殆喪其半餘衆還定州亂不可遏朝廷乃除陳楚
代之鎬再貶循州刺史卒

李道古為鄂岳都團練使元和十二年討淮西道古大敗於申州鄆城行營烏重裔李光顏奏八月六日敗績於賈店初除裴度詔下光顏及重裔謀於都監梁守謙曰若待度至而有功即非我利也不如速戰乃大出師重裔先敗光顏救之亦退韓公武革望旗而却敗

郝士美為澤潞節度使元和十二年諸道節度進討王承宗士美敗於柏鄉拔營而歸兵士死者千餘人

杜叔良為滄景節度使穆宗長慶元年十二月滄州行

營中官謝良通奏叔良領諸道兵於博野縣與鎮州賊
交戰陷沒七千餘人叔良脫身投本營二年正月貶叔
良為歸州刺史叔良始以結交貴幸用將家子累至靈
武節度使以無功罷未幾又以計取滄德及討幽鎮二
叛遇賊輒揣其無勇先犯之既陷弓高縣尋復奔敗喪
所持節故及於敗

杜元穎為西川節度使文宗太和三年十二月元穎奏
云十一月二十八日差兵馬五千人於邛州南與蠻賊

交戰官軍失利其邛州為蠻所陷

李聽以太和四年授魏州節度使時魏博史憲誠將入
覲竭其府庫魏人怨之遂殺憲誠三軍共立其大將何
進滔魏人既已為亂遂不納聽聽留館陶慢罵魏人遂
來接戰聽軍敗績不復部伍晝夜奔走纔得免死軍士
死傷過半輜重盡沒於賊公議當罪聽聽素交權倖遂
除太子少師

李係僖宗時為兗州節度使時司徒平章事荆南節度

使充諸道行營兵馬都統王鐸以係西平王晟之孫家
世將才用為都統都押衙兼湘南團練使時黃巢在嶺
南鐸悉以精甲付係令分兵扼嶺路廣明初賊自嶺南
寇湖南諸郡係守城自固不敢出戰賊編木為棧沿湘
而下急攻潭州陷之係甲兵五萬皆為賊所殺投尸於
江鐸聞係敗令部將董漢宏守江陵自率萬兵會襄陽
之師江陵竟陷於賊鐸罷相守太子太師以淮南高駢
代鐸為都統賊焚剽淮南高駢挫敗坐貶

張濬昭宗初為戶部侍中平章事請討太原乃以濬為河東行營都招討宣慰使濬軍至陰地邠岐華三鎮之師營平陽為太原將李存孝所擊一戰而敗委兵仗潰散存孝進攻晉州數日中夜濬斂眾遁走比曙喪師殆半存孝進收晉絳磁隰等州濬狼狽繇含山踰王屋出清河拆屋木縛筏濟河部下離散將盡濬敗聞朝廷聳震

梁龐師古太祖時為徐州節度使與葛從周分統大軍

渡淮以伐楊行密師古寨於清口寨地卑下或請遷移
弗聽俄有告淮人決上流者曰水至矣師古怒其惑衆
斬之已而水至我軍在淖中莫能戰而吳人襲焉故及
於敗師古沒於陣

唐懷英為陝州節度使開平元年夏命大軍以伐潞州
未克以李思安代之降為行營都虞候五月晉王率蕃
漢大軍攻下夾城懷英逃歸詣銀臺門待罪太祖宥之
改授右衛上將軍三年夏命為侍衛諸軍都指揮使尋

出為陝州節度使兼西路行營副招討使及劉知俊奔鳳翔引岐軍以圍靈武太祖遣懷英率兵救之師次長城嶺為知俊邀擊懷英敗歸四年春移華州節度使乾化二年秋命為河中行營都招討使與晉軍戰於白徑嶺敗歸於陝

王虔裕為義州刺史時蔡賊秦宗賢寇南鄙太祖令虔裕逆擊於尉氏不利而還

王景仁遙領宣州節度使檢校太傅同平章事時鎮州

作逆朋附蕃醜遂擢為上將付步騎十萬為北面行營
都招討使開平二年正月二日與晉軍戰於柏鄉王師
敗績太祖怒甚拘之私第然以兩浙元勳所薦且欲收
其後效止落平章事罷兵柄而已數月復其官爵先是
十二月仇殷奏十四日夜太陰虧帝曰我方用兵而月
蝕邢不順矣深入尤不利甚憂之止景仁駐軍邢州非
詔命無得擅進至其期夜漏三唱陰雲盡徹天象不變
命詰殷對曰四點蝕必既果如言帝又命奔騎詔景仁

勿先動仍授以破敵形勢及辰在丙戌太陽虧而丁亥日旁有稜向背若環珥或曰積暉也敬翔曰兵可憂帝盱食矣及軍書至果以二日大敗于柏鄉過詔命所止二日餘及戰又違節度賊師得我軍所棄制書讀之大駭曰若依此用兵吾曹安得噍類耶幸其違而衄耳帝追惋久之副招討使韓勅諸軍都虞候許從實左右神捷懷順神威夾馬等十指揮自尹皓而下諸將三十人免冠素服待罪於閤外帝責以違詔失律既而竝令釋

放

劉鄩末帝時遙領鎮南節度使貞明二年三月鄩率師與晉王大戰於故元城鄩軍敗績先是鄩駐軍於莘帝以河朔危困師老於外餉餽不充遣使賜鄩詔微以責讓鄩奏以寇勢方盛未可輕動帝又問鄩決勝之策鄩奏曰請人給糧十斛米盡則破敵帝不悅復遣促戰鄩召諸將會議諸將皆欲戰鄩默然一日鄩引軍攻鎮定之營彼衆大駭上下潰亂俘斬甚衆時帝遣偏將楊延直領

軍萬餘人屯澶州以應鄆既而晉王詐言歸太原鄆以
為信是月召楊延直會於魏城下鄆自莘率軍亦至與
延直會既而晉王自貝州至鄆引軍漸退至故元城西
與晉人決戰大為其所敗追襲至河上軍士赴水死者
甚衆鄆自黎陽濟河奔滑州

王彥章為北面招討使及晉王至楊劉彥章軍不利遂
罷彥章兵權朝廷聞晉人將自兗州路出師末帝急追
彥章領保鑾騎士數千人於東路守捉且以鄆州為敵

人所據因圖進取令張漢傑為監軍一日彥章渡汶以
畧鄆境至遞坊鎮為晉人所襲彥章退保中都十月四
日晉王以大軍至彥章以衆拒戰兵敗為晉將夏魯奇
所擒魯奇嘗事太祖與彥章素善及彥章敗識其語音
曰此王鐵槍因揮稍刺之彥章重傷馬踣遂就擒晉王
見彥章謂之曰爾嘗以孺子待我今日服未又問我素
聞爾善將何不保守兗州此邑素無城壘何以自固彥
章對曰大事已去非臣智力所及晉王惻然親賜藥以

封其創

賀環為宣義軍節度使北面行營招討使貞明四年十
二月環與晉人大戰於胡柳陂環軍亦敗五年春正月
晉人城德勝夾河為柵四月環率大軍攻其南柵晉人
斷我艨艟濟軍以援南柵環退軍於行臺尋以疾卒
後唐李存信為檢校司空領彬州刺史時兗鄆乞師于
武皇武皇遣存信營於莘縣與朱暄合勢以抗汴人梁
祖患之遣使謂羅弘信曰河東志在吞食河朔廻軍之

日貴道堪憂而存信戢兵無法稍侵魏之芻牧弘信怒
翻然結於梁祖乃出兵二萬以攻存信存信斂衆而退
為魏人所薄委棄輜重退保洺州軍士喪失者十二三
武皇怒大出師攻魏博屠陷諸邑存信軍於洹水汴將
葛從周氏叔琮來援魏人存信與鐵林都將落落遇汴
人於洹水南汴人為陷馬坑以待之存信戰敗落落被
擒存信又從討劉仁恭師次安塞為燕軍所敗武皇怒
謂存信曰昨日吾醉不悟賊至公不辨耶古人三敗公

殆二矣存信懼泥首謝罪幾至不測自後存信多稱病
武皇以兵柄授李嗣昭以存信為右枝而已

李嗣昭為蕃漢馬步行營都將武皇遣嗣昭與周德威
領大軍自慈隰進攻晉絳營於蒲縣汴將朱友寧氏叔
琮將兵十萬營於蒲縣之南汴帥自領軍至晉州德威
之軍大恐有虹貫德威之營氏叔琮率軍來戰德威逆
擊為汴人所敗兵仗輜重委棄殆盡朱友寧長驅至汾
州慈隰二州復為汴人所據

朱守殷莊宗時為蕃漢馬步都虞候時河上對壘帝潛師之下鄆州也守殷方守德勝寨為王彥章攻之全失禦備賊衆斷其浮橋遂失南寨莊宗聞之曰鴛才大悞予事因徹北寨往固楊劉與彥章軍沿流竝進相遇即戰北至重傷者十有八九定霸之基幾墜於此明宗聞於鄆州密請以覆軍之罪罪之莊宗私於腹心忍而不問

周德威為盧龍軍節度使時新州偏將盧文進殺其帥

李存矩叛投契丹胡騎攻我新州甚急刺史安金全不能守棄城而遁阿保機令文進部將劉殷壽為刺史固守其城帝怒遣周德威及河東鎮定之師三萬攻之營於城東俄而文進引契丹大至德威拔營而歸因為契丹所躡師旅多喪

樂彥稠為副招討使時閔帝嗣位與王思同攻鳳翔禁軍之潰彥稠欲沿流而遁為軍士所擒而獻之

任漢權為西京弓弩指揮使末帝清泰二年漢權言六

月二十一日與川賊戰兵少不敵都監崔處訥傷甚臣
部署神武堅銳兵士除夷傷外竝至鳳翔又言蓋屋都
頭許溫勇勝都頭王思儒強溫李文通下六百三十七
人竝自漢陰敗歸

張敬達為校尉太保應州刺史清泰三年九月敬達奏
此月十五日與契丹戰于太原城下王師敗績時契丹
主自率部族來援太原高行周符彥卿率左右廂騎軍
出鬪蕃軍引退已時後蕃軍復成列張敬達楊光袁安

審琦等陣於賊西北倚山橫陣諸將奮擊蕃軍屢却至
晡我騎軍將移陣蕃軍如山而進王師大敗投兵仗相
藉而死者山積是夕收拾餘衆保於晉祠南晉安寨蕃
軍壅而圍之自是音問阻絕朝廷大恐

晉沈斌少帝開運中為祁州刺史契丹入寇自鎮州迴
以羸兵驅牛羊過其城下斌乃出州兵以擊之契丹以
精騎剋其門邀之州兵陷賊

周穆令均為潞州護軍世宗顯德元年三月河東賊將

張暉率前鋒入寇營於梁侯驛潞州李筠遣令均率步
騎各千人以拒之乙亥潞州上言令均所部兵為劉崇
所襲官軍不利時令均營於太平驛驛東南拒潞州八
十里令均拒寇失於偵邏是日賊將張暉率眾凌晨而
至王師遽然被甲介馬及彼退我軍追之賊伏兵發官
軍且鬪且却步卒降賊者數百人餘眾廻保潞州我之
騎軍不傷者僅百餘人賊眾乘勝遂薄於潞州之下

李繼勳為侍衛步軍都指揮使顯德三年六月壽州賊

軍犯我南洞子王師死者數百人先是帝命繼勳領兵於壽州之南構洞屋以攻其城至是繼勳以怠於守禦為其所敗我之洞屋悉為賊所焚

冊府元龜卷四百四十三